

UCAPAN PERDANA MENTERI DI UPACARA
MERASMIKAN MESYUARAT AGUNG TAHUNAN YANG KETUJUHBELAS BANK KERJASAMA, DI DEWAN TUNKU CANSELAR, UNIVERSITI MALAYA, KUALA LUMPUR PADA
11HB NOVEMBER, 1972

Y.A.B. Tuan Yang Dipertua Bank Kerjasama¹, saudara-saudara sekalian.

Terlebih dahulu, sukalah saya mengambil sempena hari dan bulan yang berbahagia ini mengucapkan Selamat Hari Raya Aidilfitri kepada saudara-saudara, sambil berdoa semoga apa jua usaha yang kita kerjakan mendapat hidayah Allah dan membawa kepada kejayaan yang sempurna.

Hari ini juga membawa erti yang besar kepada Bank Kerjasama Malaysia dan ahli-ahlinya di seluruh negara dengan berlangsungnya Mesyuarat Agung Tahunan ke tujuh belas ini. Ibarat seorang gadis, ianya telah menjadi perawan remaja yang mempunyai daya penarik istimewa di kalangan orang ramai kerana sekitarnya terhimpun tenaga ratusan ribu anggota-anggota koperatif perseorangan dan syarikat kerjasama yang bergabung dengan Bank ini.

Seperti yang sama-sama kita maklum, Bank Kerjasama telah memulakan lembaran sejarahnya secara sederhana dalam tahun 1954 dan hari ini merupakan sebuah credit institution yang terkemuka dengan modal saham hampir-hampir \$6 juta. Dengan simpanan tetap dan savings account meningkat lebih \$16 juta, kemajuan yang dicapai oleh Bank ini dalam masa sebegitu singkat bolehlah dibanggakan.

Saya sukalah mengambil kesempatan ini mengucapkan setinggi-tinggi tahniah kepada pimpinan Bank ini, terutama Encik Abu Mansor dan rakan-rakannya tua dan muda yang telah bekerja kuat memajukan Bank ini dan menaikkan imejnya dalam sektor kewangan negara khasnya kalangan swasta. Dalam hubungan ini, sukalah saya menyebut langkah bersejarah iaitu mengadakan Perjanjian Kerjasama dengan Bank Chase Manhattan bulan Jun dulu di mana

¹ Y.B. Dato Harun bin Haji Idris.

kedua-dua bank bekerjasama membiayai projek-projek pertanian, perdagangan dan perindustrian. Saya percaya dengan adanya peraturan ini, Bank Kerjasama boleh mengambil peranan utama sebagai pelupur rural credit demi perkembangan ekonomi luar bandar.

Saudara-saudara,

Seperti yang seringkali saya sebutkan di masa sudah-sudah, saya ingin supaya gerakan koperatif di negara kita ini benar-benar menjadi alat untuk revolusi ekonomi di kalangan rakyat luar bandar khususnya orang-orang Melayu. Demi tujuan inilah saya menggesa supaya pertubuhan-pertubuhan koperatif luar bandar bergerak dengan sikap baru dan lebih dinamis memberikan pimpinan kepada masyarakat tempatan supaya mereka benar-benar memahami matlamat Dasar Ekonomi Baru dan menyertai kegiatan-kegiatannya.

Pada amnya, gerakan kerjasama luar bandar telah mencapai banyak kemajuan misalnya melalui syarikat kerjasama kilang padi, kedai runcit, pengangkutan dan lain-lain. Bagaimanapun, lapangan yang masih luas lagi dan dalam hubungan ini saya rasa credit institution seperti Bank Kerjasama ini boleh memainkan peranan penting—identifying projects, planning, financing dan co-ordinating kegiatan-kegiatan pertubuhan kerjasama supaya mendapat faedah besar. Umpamanya, dalam briefing yang diberikan kepada saya beberapa hari lalu, ada rancangan Bahagian Belia meningkatkan kegiatan Farming Youths atau Belia Tani di lapangan cash-crop farming seperti bertanam sayur-sayuran dan sebagainya. Mereka ada kemahuan, ada tenaga dan sudah adapun projek yang ditentukan tetapi mereka perlukan modal. Saya fikir sangatlah baik bagi banking institution yang rural-oriented menumpukan perhatian kepada usaha-usaha seperti ini dan dengan itu membantu belia kita supaya berdikari dan mengurangkan tekanan pengangguran di kalangan mereka.

Saudara-saudara,

Meskipun perkara ini telah seringkali saya katakan di masa lalu, namun perlu saya mengulangi lagi hasrat Kerajaan hendak mengubah structure masyarakat sebagai jaminan untuk masa depan yang lebih cerah bagi negara kita. Prinsip utama dalam proses penyusunan semula atau restructuring of society ini ialah perubahan sikap orang-orang kita supaya menerima norm atau ukuran hidup

baru sesuai dengan keperluan masyarakat moden. Dalam ertikata yang lain, masyarakat negara ini khasnya masyarakat Melayu menghendaki proses perubahan sikap yang lambat laun menjadikan mereka masyarakat moden atau urbanised kedua-dua dari segi pemikiran dan juga penghidupan.

Urbanisation atau pembedaran yang saya maksudkan itu bukanlah bermakna semata-mata membawa orang-orang kita berhijrah ke bandar atau pun dengan membawa keadaan hidup moden bandar ke kampung semata-mata. Proses berhijrah memang tetap berlaku terutama belia mencari pekerjaan. Tetapi perubahan yang kita kehendaki ialah dalam bentuk pemikiran yang sesuai dengan keadaan hari ini di mana setiap orang hendaklah berusaha ber-sungguh-sungguh meniggikan pendapatannya supaya dapat menikmati taraf ekonomi yang lebih baik daripada keadaan dalam masa yang lalu. Dengan keadaan ekonomi dan sosial yang lebih baik maka dapatlah mereka memberikan jaminan kehidupan yang lebih baik pula kepada anak-anak mereka yang mewarisi kehidupan mereka kelak.

Berhubung dengan ini, maka mustahak orang-orang kita yang diam di kampung menerima dan mengamalkan konsep ekonomi kewangan dan menjimatkan sebahagian daripada pendapatan mereka samada disimpan di bank seperti Bank Kerjasama ini ataupun bank-bank yang lain untuk digunakan sebagai modal pelaburan dalam projek-projek yang disusun oleh Kerajaan seperti Amanah Saham MARA dan sebagainya.

Bentuk masyarakat hendaklah diubah dan kehidupan secara subsistence yang lama itu sudah tidak sesuai lagi dengan kehendak-kehendak kita hari ini. Sebaliknya, mereka itu hendaklah dipimpin supaya lebih mementingkan usaha-usaha pendapatan atau income oriented kerana dengan cara ini sajalah mereka dapat mengumpulkan harta pendapatan yang lebih kekal dan bermunafaat kepada mereka dan kaum keluarga mereka di masa hadapan.

Begitu juga Kerajaan sedang memperhebatkan proses memajukan pekan-pekan kecil dan sederhana sebagai new growth centres, termasuk kawasan-kawasan baru di Pahang Tenggara, di Jengka Tiga Segi, di Johor Tenggara dan lain-lain. Saya berharap dalam masa beberapa tahun yang akan datang ini, pusat-pusat pertumbuhan baru ini akan menjadi tumpuan sebahagian besar daripada orang-orang kita sebagai tempat atau tapak kehidupan baru mereka di

mana mereka akan diam dalam suasana masyarakat perindustrian dan perdagangan. Pusat-pusat baru ini akan membuka peluang dan kesempatan yang lebih luas terutama bagi kalangan belia yang terlatih dalam jurusan kemahiran samada bekerja di kilang-kilang perindustrian atau di dalam lapangan pertanian moden mahupun sebagai pengusaha sendiri.

Bagaimanapun, bagi sebahagian terbesar orang-orang kita yang kekal diam di kampung, mereka akan ketinggalan zaman jika tidak sama-sama terlibat atau melibatkan diri dalam proses pambangunan ini. Saya rasa dengan panduan dan pimpinan melalui gerakan koperatif, persatuan peladang, belia tani dan lain-lain, perubahan ini dapat dilancarkan meliputi seluruh negara dan melibatkan semuanya.

Inilah tujuan muktamad Dasar Ekonomi Baru Kerajaan yang bukan hanya setakat mengadakan peluang-peluang bekerja, memajukan kawasan-kawasan baru dan membina new growth centres. Bahkan yang lebih penting dan utama kepada saya ialah membentuk manusia Malaysia baru yang bakal menjadi anggota masyarakat Malaysia baru untuk zaman berzaman sesuai dengan kemajuan sains dan teknologi.

Saudara-saudara,

Berbalik semula kepada Bank Kerjasama ini, inginlah saya mengulangi harapan semoga ianya meneruskan usaha-usaha besar terutama di bidang perindustrian moden seperti rancangan Paper dan Pulp Industry di samping kegiatan-kegiatan biasanya. Pengalaman menjadi *underwriter* seperti dengan syarikat Unilite baru-baru ini adalah menggalakkan dan patutlah dilipatgandakan di masa akan datang.

Malaysia masih dapat mencari pengalaman di bidang koperatif dari negara-negara Barat yang membangun. Kegiatan-kegiatan koperatif di negara seperti Denmark dan Sweden patut kita tau-ladani dan diubahsuaikan menurut keperluan kita di sini.

Begitu juga saya perhatikan konsep koperatif yang berjalan di negara-negara lain di Eropah Timur sangat berkesan dan patut benar disesuaikan dengan gerakan koperatif di sana yang maju dan progresif memasuki lapangan perniagaan dan perindustrian secara besar-besaran, di mana ahli-ahli koperatif sendiri ikut serta dalam kegiatan-kegiatan dan tidak hanya menjadi ahli yang pasif

sahaja. Pada pendapat saya, konsep penyertaan atau participation ahli-ahli ini patut benar dijalankan dengan lebih luas lagi khasnya di bidang consumer trade dan consumer service. Umpamanya, dengan mengadakan satu rangkaian kedai-kedai atau a chain of consumer shops di merata-rata tempat maka ahli-ahli koperasi akan berpeluang melibatkan diri mereka ataupun menempatkan anak-anak mereka bekerja dan belajar berniaga di situ. Inilah cara yang benar-benar memberi kesan kepada ahli-ahli koperasi supaya menumpukan minat mereka kepada kegiatan koperasi dan menarik lebih ramai orang-orang kita memasuki gerakan itu. Konsep inilah saya fikir dapat menggerakkan koperasi kita melangkah maju dengan lebih pesat lagi di masa akan datang. Jadi, tegasnya janganlah bimbang mempelajari kemajuan negara-negara lain asal saja mendatangkan munafaat kepada kita semua.

Saudara-saudara,

Dengan harapan semua Bank Kerjasama ini mencapai kejayaan yang terus menerus, saya dengan sukacitanya merasmikan Mesyuarat Agung Tahunan Bank ini dengan ucapan selamat bersidang.